

7. april 2014

UPA 2014/19
Lars Mathæussen

Nunat Avannarliit Killiit Siunnersuisoqatigiiffiata Savalimmiuni, Islandimi Kalaallit Nunaannilu naalackersuisunut kaammattuutigaa allanniarnermik atuarniarnermillu ajornartorsiuteqartunut atuartinneqarnissamik neqeroorut suleqatigiillutik nukittorsassagaat. Assersuutigalugu suliassaqarfimmi ataatsimut ilisimatusarnikkut aammalu nunat oqartussaasuisa susassaqartut suleqatigiinnissaata qulakkeerneratigut, taamaalilluni ilisimasanik iliuitsinillu pitsaanerpaanik avitseqatigiinnissaq qulakkeerneqarsinnaaqqullugu.
(Aallartitat siulittaasuat Lars-Emil Johansen)

Nunat Avannarliit Killiit Siunnersuisooqatigiiffiata kaammattuutaa Siumumiik ima oqaaseqarfigissavarput.

Pineqartut tassaapput atuarniarnikkut allanniarnikkullu ajornartorsiuteqartut, pineqartut nunani avannarlerni killerni suli tamakkiisumik siunniussivigineqarsimanngitsut paasinarpoq, naak suliniuteqarneq ukiorpaalunni ingerlareersimagaluartoq.

Qujanaqaarli ataatsimoorussinikkut siunniussassamik kissaateqartoqalernera, ilisimasalli suli pappialamiingillat tamakkiisumik, qutsavissaappulli suliniuteqalersimasut suliassamillu soqutiginnittut.

Suliassami pingaarutilimmi siunniussillutik suliallit ikittuinnaapput, taakku ilagaat Sisimiuni Knud Rasmussen-ip Højskoliani pineqartunik sisamanik ilinniartitsilluni suliaqartoq, taannalu qutsavigisariaqarparput siulersorneqarnermini suliassamut piumassuseqarmat.

Aammattaq soqutiginarpoq sanilitsinni angajoqqaat ilisimasaat atorneqarsimammata, pitsaasuuvormi nunami namminermi ilisimasanik atuinissaq, soorlu nunatsinni ilisimaneqarpoq atuarsinnaanermik allassinnaanermillu ajornartorsiuteqaraluarlutik allanut nallersuullutik inuussutissarsiummik ingerlataqartoqarmat, tassani angajoqqaat taama angu-saqartitsisimasut ilisimasaannik atuinissaq avaqqukkuminaatsoq erserpoq.

Nunat Avannarliit Killiit Siunnersuisooqatigiivisa kaammattuutaat Siumumiik tamakkiisumik taperserparput aammalu piumasarlugu Naalackersuisut siunniussassamik naammassinninniarnermi nunani pineqartuni ilisimasanik katersinissanut piumassuseqassasoq kissaatigigatsigu.

Nunatsinni nammineq akunnitsinni suliarnik ammasumik suliaqalernerup kingunerissuaa pineqartut saaffiginnissasut sullinneqarlutik paasigunikku, taamaaliornikkummi aatsaat tamakkiinerusumik pineqartut qanoq amerlatiginersut paasineqarsinnaassammata.

Aammattaaq sullissiniarnermi isiginiarneqassasoq kissaatigiinnagassaavoq pineqartut sumik piginnaasaqarnerisa aallaavigineqartarnissaat kissaatiginarmat, pappialarsornipiluunermummi piffissarujussuarmik atuinissap akisuallaalernissaa takorlooruminarmat.

Taama naatsumik oqaaseqarluta Nunat Avannarliit Killiit Siunnersuisooqatigiivisa kaammattuutaat tamakkissumik taperserparput.